

## Ọkwukwo izi Połu gbañennu Taịtosi

### **Nhne gbasiri ọkwukwo izi ka**

Połu kwuru nhne gbasiri Taịtosi nü hne zị ichne ichne nü rime ọkwukwo izi ọ gbaru. Ọ karu nü ya nü Taitosi sno rnü ernalu izi ọma nü Esia Mati nü Girisi (2 Kɔrinti 2; Galasia 2:3). Połu kannu a, ọ hoḥia ele risi nü ele jeelekota ọgbako Chiokike anya nü Kiriti.

Połu kannu Taịtosi o whnu ele risi nü ele neelekota ọgbako Chiokike bu ele, ele badnu nookwu ọka ọma (1:5-9). Kpakara ele sno Nyenwe aị jojobu ele bitaru ẹhni be snam, ele zá neesigha ọka (1:10-2:9).

Połu kwuru ọka gbasiri ele zị ichne ichne nü rime ọgbako Chiokike ke zị nü Kiriti. Ọ karu nü a nwernu rikne o wu bùdnu ikne kwnornu nü Chiokike ziyan Jizosì Karaìsi, Chiokike znohiaru aị, snuma aị hite nü rikne Enine Nso, mee aị a panizo bùdnu ikne ke nwernu olile anya bùdnu kwó okwo. Chiokike znohiaru aị kwnornu nü ọ bu nye obirizi, ọ buo kwnornu nhne ọma ọbula a mernu.

### **Nhne zị n'ọkwukwo izi ka**

Obekwu ikwu nü okpukpe Połu kpenu Taịtosi  
(1:1-4)

Ezni ele risi ọgbako Chiokike (1:5-16)

Ezni ke Ọgbako Chiokike (2:1---3:11)

Ezni ke o zniñni Taịtosi nü obekwu ikwu ipne-aznụ (3:12-15)

<sup>1</sup> Mawa, Poļu nye izi ke Chiokike nü nye izi Jizoşı Karaısı. Ernu m bụ o mee ele Chiokike hohiaru nwe ɔkwnata ovu, ma be mahia ezi ɔka ke noodubna n'otu ogwnu Chiokike, <sup>2</sup> ma be nwehia olile anya buđnu kwó okwo, hne Chiokike zá naagha aghalaghala, bụ ke o kweru mkwna su ɔwa panizoru. <sup>3</sup> O mernu ikwu-ɔnu a whuya iwhne n'ige ke a hite nü ogbasa izi ɔma, bụ ke o yisiri n'aka m lele nhne Chiokike Nye Oznohia aị nyernu n'iwu. <sup>4</sup> M naagbanu i Tajtosı nnwɔ m n'ezi n'ɔkwnata ovu ke a kwekötaru okwukwo.

Oru, nü udno ke hi n'aka Chiokike Nda aị nü Jizoşı Karaısı, Nye Oznohia aị.

### *Ernu Tajtosı nü rime*

#### *Kiriti*

<sup>5</sup> Nhne mernu me gharuru i nü Kiriti bụ ma i bijkwata nhne ke kwesiri ɔbikwa, hohia ele okno badnụ nü rime eli-ɔhna ɔbula, lele kpa me kannu i. <sup>6</sup> Nye okno badnụ kwesiri ɔ bụ nye nwée ɔtna, nye lụ otu nnwerne, nye nwernu rụmu be tükwasiri mkpoma, nye kpáhie agwa, ele mée risi rikne. <sup>7</sup> Kwnornu nü nye risi jøobu nye nwée ɔtna lele nye izi Chiokike, nye mée n'iche ovu a, wé ovu ehni wara wara, nye zá nqonwo manya gbu ogbu, nye mée nhne rikne, nye nwée ɔwho-anaya. <sup>8</sup> ɔ jøobu nye neelekota ele izne, nye whnurnu nhne ɔma n'anya, nye zá neemewhe nhne ike, nye zì snam, ziri nsɔ, nye neejikwaru ehni a. <sup>9</sup> O jikwaru ɔka wam ke kwesiri ɔkwnata ovu rikne lele kpa be znirni a, ma o mesi ele berere ovu rikne hite n'iznizni a zì snam, gesi masi ele neemegidne a nhne ojo be.

<sup>10</sup> Agida ele kwé ekwe nooduwhu ele berere hite nü ikwu-ɔnu etekne, ke kakwo ele knesnigwụ

omen'eli ele Ju aka rikne. <sup>11</sup> Be kwesiri o mee be kpusni ọnu be, ele noolulu agwna ezi-nụ-oro, ele neezni nhne be kwésile o zni, kwnornu iわai. <sup>12</sup> Otu nye ọwhnurninya be, nye Kiriti, karụ kpa, “Ele Kiriti bụ ele aghalaghala, ele ovu ojo lele anohia, ele ime-mgwụ, nụ ele okne nkoli.” <sup>13</sup> Nhne o kwuru bụ ezi ọka, ka kpayarụ bigbosị be rikne, ma be gwuzosi rikne n'okwnata ovu, <sup>14</sup> ma be gharụ iznizni aghalaghala ele Ju nụ iwu ele badnụ ke hi n'aka ele whogaru n'ezi ọka. <sup>15</sup> Kpakara nhne zi rịchna n'anya ele zi rịchna, koyu nye ruru ọru nụ nye kwé ekwe, ọ zá nhne zi rịchna, kwnornu nụ akoniche be nụ echiche be ruru ọru. <sup>16</sup> Be karụ nụ be magwụ Chiokike, koyu ẹrnu be neegesi nụ be noogonahoru a. Ele sọ ize, ele risi rikne, ele nwée rikne mee nhne ọma ọbula.

## 2

### *Iznizni zi snam*

<sup>1</sup> Gbalị zni iznizni zi snam. <sup>2</sup> Ele okno badnụ nwernu anya udno, ele nwernu ọso n'anya, ele zá neemewhe nhne ike, ele zi kwem n'okwnata ovu be, nụ ọwhnun'anya nụ ndidi. <sup>3</sup> Ele okno badnụ ele rinya masị wuru bjudu lele ele zi nsọ, ele zá noobno ele berere nhne, ele zá nqonwo manya gbu ogbu, ele neezni nhne bürü ọma, <sup>4</sup> ma be zni ele nnwerne ikne anya udno, whnụ nzi be nụ rụmu be n'anya. <sup>5</sup> Be kwesiri ọ bürü ele zá neemewhe nhne ike, ele zi rịchna, ele rinya neelegidne oro be anya nkari, ele noobnonu nzi be nsnị, ma ele badnụ gharụ ọ kaja ikwu-ọnụ Chiokike.

<sup>6</sup> Kpam masị, neezni rụmu ikoro ma be bürü ele zá neemewhe nhne ike. <sup>7</sup> Nụ kpakara nhne

i neeme, gesi əhni i nye ọma atu n'érnu ọma. Nü nhne i neezni gwuzosi rikne nü rime a, nye anya duru əli. <sup>8</sup> Ikwu-ọnu bürü ọma ma nye Ọbula ke neemegidne i tụ iwhnerne hne be nwée nhne ojo be jeeji nookwugidne aị.

<sup>9</sup> Zni ele əhi be bnonu ele nwe be nsnị nü kpakara nhne, neeme nhne joso be n'ọnu, be sá ọka nga be nookwunu be ọka. <sup>10</sup> Be znú nhne ele nwe be, kovu be gesi nü be jootukwasi be mkpoma, neegesi nhne ọma ke zị nü iznizni Chiokike Nye Oznohia aị nü kpakara nhne.

<sup>11</sup> Oru Chiokike ke neegweya oznohia whuyaru iwhne hne kpakara ele badnụ zị, <sup>12</sup> neezni aị a sigbasi nhne nögwnu ano-ehni aị n'owa, nü bùdnu ke zá nötou ogwnu Chiokike, a wuru bùdnu ele zá neemewhe nhne ike, ome mma, nötou ogwnu Chiokike nü rime ọwa ka. <sup>13</sup> A nwernu olile anya zị ngozi, bụ ọ whuya iwhne igwugwu ke Chiokike hna ezi nü Nye Oznohia aị Jizoşı Karaısı. <sup>14</sup> O bụ nye gweru əhni a nyee n'ònodi aị ma ọ gbahịa aị nü rime nhne ojo, bitannu əhni a ele ke a, ele zị rìchma, ele ovu nearerne békwnu n'érnu ọma. <sup>15</sup> Zni kpakara nhne ka, naakwnagidne, bna mbna nü kpakara rikne i nwernu. I kwé badnụ Ọbula ledna i anya.

### 3

#### *Budnu nye Karaısı*

<sup>1</sup> Chenwanyanụ ele badnụ be bita əhni be nü mkipururu ele risi nü ele nẹechi əchi, noobno nsnị, jiknernu ọ rnụ ərnu ọma, <sup>2</sup> be kwúkọ ọka ojo megidne badnụ Ọbula, be bürü ele udno, ele agwa ọma, ele ovu hieru əli hne kpakara ele badnụ zị.

<sup>3</sup> N'ige mbom, a bụ ele iwhnirniwhno, ele zá noobno nsnị, ele be duwhuru, noosno agıda nhne ojo zị odo nụ ọdo ke nögwnu aị, a wuru bğdnu ojo, kwno awụwa, be snornu aị irno, aịla sno masi be irno. <sup>4</sup> Kovi nga ovu ọma nụ əwhnun'anya Chiokike Nye Oznohia aị whuyaru iwhne, <sup>5</sup> ọ znohia aị, ọ búo kwnornu ərnu ọma a rnurnu, kovi kwnornu obirizi a. Hite n'osnusnu ke ọmu berere, Enine Nso nyernu aị bğdnu ikne. <sup>6</sup> Chiokike wükwasiri aị Enine Nso k'agıda hite nụ Jizəsi Karaşı Nye Oznohia aị. <sup>7</sup> Hne o gwnurnu aị lele ele mee mma hite n'oru, a bğru ele neekehia olile anya bğdnu kwó okwo. <sup>8</sup> Ka bụ ọka kwesiri əkwnata ovu. M naakaa, jị kwusi a rikne ma ele kweru nụ Chiokike bğru ele anya dğru əli, neeme nhne bğru ọma. Kpakara nhne ka bğru ọma naabna iru hne ele badnụ zị.

<sup>9</sup> Kovi zeru ajiji iwhnirniwhno, nụ əgwnu rəwhna əbnurnu, oknorno, ọlu əgwnu kwnornu iwu, be bnána iru, be bụ nhne etekne. <sup>10</sup> Dọ nye əbula ke neegweya okewa aka nụ nsnị mgba lawuru, i mekwo, gharu a. <sup>11</sup> I magwụ nụ badnụ kị bụ nye aghorome, nye mmehie, ọ bụ nye naama əhni a ikpe.

### *Ezni ipne-aznu*

<sup>12</sup> Nga me jeeziya Atemasi nụ Taịkikosi, hna anụ zị, gbalị vakwnusi m nụ Nikopolisi, kwnornu nụ m jaadazi pii n'ige okirika. <sup>13</sup> Gbalị yisinu Zenasi nye əgwnu iwu nụ Apolosi aka n'izne be, whnụ nụ be nwehịarу nhne əbula be pioru. <sup>14</sup> Ele ke aị mughia kpa be jeeji ige be rnụ ərnu ọma, rnụhia nhne zị mkpa, be wúkọ badnụ bnána nụ nhne. <sup>15</sup> Kpakara ele me nụ be zị neebekwu i. Bekwu

Tajtosı 3:15

vi

Tajtosı 3:15

kpakara ele whnūrnū aị n'anya nụ rime ọkwnata  
ovu. Oru Chiokike dazịnū kpakara anụ.

## **Tesitamenti Ikne n'Onu Ikwere New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

### **Copyright Information**

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

### **The New Testament**

in Ikwere

**© 2010, The Nigeria Bible Translation Trust.  
All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c17ee3a1-1c7a-5c05-8e0f-5043e8228d89